



UNIVERSITÄTS-  
BIBLIOTHEK  
PADERBORN

## **Universitätsbibliothek Paderborn**

### **Conciliorvm Omnivm Generalivm Et Provincialivm Collectio Regia**

Ab anno MCLXXXI. ad annum MCCCXIV.

**Parisiis, 1644**

Epistola XII. Caelestini Papae III. Ad Clericos Eboracenses. Eiusdem  
argumenti.

**urn:nbn:de:hbz:466:1-15974**

EPISTOLA XII.  
CÆLESTINI PAPÆ III.

AD CLERICOS EBORACENSES.

Eiusdem argumenti.

*Cælestinus episcopus seruus seruorum Dei dilectis filiis vniuersis abbatibus, prioribus, archidiaconis, decanis, & aliis clericis, comitibus, & baronibus, & aliis in Eboracensi prouincia constitutis, salutem & apostolicam benedictionem.*

QVAM misericorditer Romana ecclesia super facto Eboracensis archiepiscopi processerit videre licet, si literarum nostrarum tenorem, quas vtraque partium a sede apostolica diuersis temporibus impetrauit, diligenter attendatis. Cum enim, significantibus dilectis filiis decano & capitulo Eboracensi, & non paucis abbatibus, prioribus, & aliis ecclesiæ prælatis in regno Angliæ constitutis, ad apostolatus nostri audientiam peruenisset, dictum archiepiscopum, pastoralis officii debito prætermisso, sæcularibus negotiis implicari, & non diuinis obsequiis, non clericis ordinandis, non ecclesiis dedicandis, non Synodis celebrandis, non benedicendis abbatibus, sed venationibus & aucupio totius animi sui studium applicare, & exercere alia quæ commisso sibi officio pontificali & honori non modicum derogant; non statim formauius iudicium contra eum, sed inquisitionem famæ ipsius venerabili fratri nostro Lincolnensi episcopo, & dilectis filiis archidiacono de Northamtun & priori de Ponte \* fracto duximus committendam; cupientes ipsum archiepiscopum per interminationem suspensionis, si de his quæ nobis fuerant significata constaret, vel si ea legitime comprobari non possent per exhibitionem canonicæ purgationis, quam ei cum tribus episcopis & totidem abbatibus feceramus indici, a suis excessibus deterrere, & ad veritatis tramitem reuocare. Verum quoniam idem archiepiscopus, antequam citatio eorumdē iudicum peruenisset, ad sedem appellauit apostolicam, dicti iudices iuxta literarum nostrarū tenorem, spatio ei trium mensium indulto, Kalendas Iunii, quo appellationem interpositam prosequi non differret, ipsi procurauerunt pro termino assi-

*Concil. Tom. 28.*

I

gnare. Deinde vero cum archiepiscopus ipse iter arripuisset ad sedem apostolicam veniendi, timens ne propter inclementiam aeris aliquod personæ ipsius periculum eueniret, a nobis literis & nuntiis postulauit, vt statutum sibi terminum deberemus misericorditer prorogare: nos vero precibus ipsius annuentes, & credentes quod eo citius de suis excessibus pœniteret, quod nos ad audiendas petitiones suas magis propitios & faciles inueniret, terminum vsque ad octauas B. Martini proximo præterituras prosequendæ appellationis ad ipsum purgandû statuimus, memoratis iudicibus dantes nihilo minus in mandatis, vt si tûc inde archiepiscopus nostro aspectui neglexerit se præsentare, exinde iuxta priorum literarum tenorem in causâ procederent, & quæ ipsis per easdem literas mandata fuerant exequi procurarent. Ceterum memorato termino iam transacto, cum ad Romanam ecclesiam nec accesserit, nec aliquem miserit responsalem, qui absentiam suam quolibet modo excusaret, ipsius inobedientiam & contumaciam attendentes, ipsum ab vsu pallii, & pontificalis officii executione, administratione etiam tam temporalium, quam spiritualium, ac perceptione beneficiorum duximus suspendendum; memoratis iudicibus per apostolica scripta mandantes, vt eum per totam Eboracensem diocesim, & prouinciam suspensum a nobis publice statuunt nuntiare. Ideoque vniuersitati vestræ per apostolica scripta mandamus, quatenus eidem archiepiscopo, vel officialibus eius, nec in spiritualibus nec in temporalibus præsumatis aliquatenus respondere: sed si quas inter aliquos vestrum in Eboracensi diœcesi positorum quæstiones oriri contingat, quæ iudicio ecclesiastico debeant terminari, ad audientiam dilecti filii nostri Simonis Eboracensis decani easdem controuersias deferatis, ipsius iudicium recepturi humiliter, & firmiter seruaturi; scientes nos eidem decano de solita sedis apostolicæ misericordia indulgisse, vt cum consilio canonicorum suorum in Eboracensi ecclesia residentium excessus corrigat clericorum, & eorum ac laicorum qui ecclesiasticam audientiam exigunt, in Eboracensi diœcesi definiat quæstiones.

Datum Laterani decimo Kalendas Ianuarii, pontificatus nostri anno quinto.